

中國方志叢書·華北地方·第五六二號

據

清嘉慶十四年刊本
清張伯魁纂修

影印

甘肅省

徽縣志

(二)

成文出版社有限公司印行

徽縣志卷之六

人物志上

人藉地靈地以人重徽雖僻壤山水之秀應產英
奇彼搢紳先生固得大書特書光於茲土而忠孝
節義代有聞人徽尤冠於秦隴間也今據舊志人
物以後分忠義孝友節烈等傳事非溢美品目昭
然惟是百十年來科名寥寂其間宏儒碩學推重
於鄉豈敢以顯晦殊途故爲湮沒耶至於寓賢仙

釋人竝可傳悉皆依類附之志人物第六

宋

崔立字本之河池人祖周度仕周爲秦寧軍節度使
慕容彥超叛周度以大義責之遂見殺立中進士
第爲果州團練推官役兵輦官物道險乃率衆錢
傭舟載歸知州姜從草論如法當斬三人立曰此
罪杖耳從草不聽奏之詔如立議眞宗時特改大
理寺丞會滑州塞河決調民出芻槌命立提舉計

其用有餘而下戶未輸者尙二百萬忝奏弛之知
江陰軍立教民濬治水港灌田二千頃及開橫河
六十里通運漕遷太常卿立遇事敢言前後上四
十餘事以尙書工部侍郎致仕

王靖字安之河池人登進士仕爲金紫光祿大夫純
孝忠信教子有義方起家至千石生平謙遜不忤
於物不以富貴驕人閭里推爲長者子杞柄姪挺
俱登進士柄官朝請大夫賜紫金魚袋

煥靖之孫煥以進士知武當縣建炎間賊犯鈞州
煥率邑人保山寨賊至或勸之遁煥曰使我有此
心則不能與邑人爲此謀耳遂力戰守之遷京西
湖廣路制置使授忠訓郎弟焯修職郎知同谷縣
主管勸農公事焯從仕郎

曹友聞字允叔栗亭人彬十二世孫登寶慶初進士
授天水軍教授時寇方盛制置使李憲檄管忠義
領所部守山敵破七方關長驅入劔門友聞與弟

萬各率所部取間道戰於白水江中流兵退北兵
畧河池抵同慶友聞部分諸將各守一門偃旗伏
鼓戒士卒俟漸近鳴張旗鼓矢石並發又命將取
間道出戰自提重兵尾敵後大戰有功北兵又破
沔州擣大安友聞遣王資白再興速趨雞冠隘王
進據陽平關友聞登溪嶺指麾甫畢兵數萬突至
陽平關諸將突出陣前左右馳射兵乃解去特授
友聞及弟萬皆節制同戍軍馬明年扼仙人關制

置使趙彥呐檄友聞控制大安以保蜀口友聞馳
書曰沔陽蜀之險要吾重兵在此敵有後顧之憂
必不能越沔陽而入蜀又有曹萬王宣首尾應援
可保必勝大安地勢平曠無險可守况衆寡不敵
豈可於平地控禦彥呐不以爲然一日持小紅牌
來速者七友聞議爲以寡擊衆非乘夜出奇內外
夾擊不可乃遣兵上雞冠隘多張旗幟示敵堅守
友聞選精銳萬人夜渡江密往流溪設伏親率精

兵二千疾馳至隘下先遣敢死士五百人衝前前
軍不動會大風雨諸將請曰雨不止泥濘深沒足
宜俟少霽友聞斥曰敵知我伏兵在此緩必失機
遂擁兵齊進內外兩軍皆死戰血流二十里西軍
素綿裘代鐵甲經雨濡濕不利步鬪黎明敵兵益
增迺以鐵騎四面圍繞友聞嘆曰此殆天乎吾有
死而已矣於是極口詬罵血戰愈厲與弟萬俱死
事聞贈龍圖閣學士大中大夫賜廟褒忠謚曰節

官其二子萬特贈武翼大夫

張珏字尹玉河池人少從軍以功累官中軍都統制
寶歷末諸道兵圍合州珏守合九月不能下淳熙
初寶興亦提兵出合城珏碇舟斷江中爲水城大
兵數萬攻之不克遂引去珏外以兵護耕內教民
墾田積粟再期公私兼足德佑初陞四川置制使
加少保徵兵入衛蜀道斷不得達明年復瀘州趙
定應迎珏入會重慶爲置制使珏聞二王立廣中

遣兵數百人趨王所求援不至遣張萬入夔連忠
涪拔石門及巴巫十八砦獲將士百餘人解大寧
圍至元間大兵破紹慶執守將珏兵大潰城中糧
盡或說珏降不聽率兵巷戰不支求死不得明日
與萬戶特木爾遇被執至安西趙老菴解弓自縊
從者焚其骨以瓦缶葬之死所珏魁雄有謀善用
兵出奇設伏算無遺策士卒必練器械必精治部
曲有法有功雖奴隸必賞有過雖至親必罰以故

人人用命

元

曹友慶友聞弟西城滿子阿釐拒境不庭友慶力戰
獲之天子賜以文綺二端襲父爵拜武德將軍佩
虎符雲南土夷蛇截驕橫逞兵友慶從參政汪公
殄滅之八蕃永寧賴以輯寧拜武德將軍居鄉周
給患難有長者之風壽六十而卒弟友善宣授進
義副尉屢有奇績子三人禹臣行秦州管軍千戶

晉臣掌虎符領砲翼性沈晦寡交接不爲流俗所
遷漢臣鞏昌等處總管府同知惠政良多無忝厥
祖友善子舜臣行秦州行征元帥弟友直孫祥勛
授進義校尉管軍千戶

楨友諒孫佩虎符宣授武德將軍鞏昌等處砲水
手萬戶奉命征進河南屢獲殊績賞賚甚厚軍旅
之間每念慈母未嘗不歔泣流涕總兵官以忠孝
咨嗟至正乙未歸於鄉忠勤於國孝養於家溫恭

克己閭里稱賢

高冲謙父臘住正千戶屢立戰功冲謙少負才名歷任湖南中路總管取予廉潔贈中奉大夫

宗道冲謙子有志節精文武才任正萬戶歷職効勞行樞密院竄誅奸宄表章賢良以子貴任榮祿

大夫

明

高斗南字拱極初以州薦授四川定遠縣知縣惠政

方民爲之謠曰江上高樓鼓角鳴至今吹出斗
聞聲三載考績以他故下刑部獄定遠耆民赴闕
奏其廉能太祖赦之仍命知定遠賜資特優宴而
遣之時舉天下廉官斗南與焉九載攷最陞雲南
新興知州新興人愛戴如定遠居數年以衰老乞
閑薦子恂以代允之厚遣歸

恂斗南子字信士十二歲通五經博極羣書善屬
詩文習騎射以父薦召至京太祖奇之命翰林兵

部兩試焉皆列優等授禮科給事中奏劾不避權
貴代父知新興州時安南王陳日燿爲黎季所殺
聲教旣阻新興密邇安南上遣成國公朱能往討
恂權行司馬參贊軍務大將而下咸聽節制乃以
大軍二十萬協能航海趨安南宣揚教化撫順凶
逆脩諭安慰之意蠻人肅然獻功方至新興病卒
年三十七三軍無不慟哭

胡彥祥少有大志刻苦力學永樂中以鄉貢爲肅寧

令自奉清約取予不苟擢監察御史巡按北直陝
強扶弱貴戚斂手還知眉州德威竝施重農興學
修堰以廣水利陞保寧府再遷河間山西參政俸
祿自給外悉以給公家無私焉

王謙由監生知壽州單騎赴任將入境移檄杜絕奔
競至州宣布德威勸農桑別善良恤鰥寡發奸摘
伏號稱神明除去弊端䟽通利源百姓安樂九載
考績壽民赴京乞留朝廷下詔褒之加參議歷任

三十餘年以衰老致仕

高儒字崇文恂之子以鄉貢授豹韜衛經歷改懷來
衛廉謹勤事九年陞山西石州同知石州田賦積
年逋欠儒至凡利弊因革力贊長吏爲之而陰用
其機踰年大治

文獻成化中舉人爲監察御史以正直稱巡按北直
雲南河南所至貪污吏望風遁去河南有賊殺人
奪貨誤坐平民獻密訪得賊踪獲贓及克器人稱